

詩

數

詩數

雜編二

遺逸下

三國

東越胡應麟著

晉陳壽以魏吳蜀爲三國唐丘悅以江南鄴下關中爲三國咸總南北名之余所稱三國則皆北朝也蓋拓拔魏高齊宇文周氏云或曰昌黎氏謂齊梁陳隋作等蟬噪六代諸人且爾矧三氏區區乎然芙蓉楊柳宋人舉以難韓者實高齊詩彼謂溫子昇吐任舍沈錄謝凌顏誠匪篤論徐孝穆寒山片石亦寧免于迂譚余旣詳迄六代諸人篇什以三氏詩家者流率存而弗論者因稍差次其品流品題其撰述而馮氏

所收間有遺逸亦附見焉

李延壽云永明天監之際太和天保之間洛陽江左文雅尤盛彼此好尚互有同異江左宮商發越貴於清綺河朔詞義貞剛重乎氣質氣質則理勝其詞清綺則文過其意理深者便於時用文華者宜於詠歌此其南北詞人得失之大較也若能掇彼清音簡茲累句各去所短合其兩長則文質彬彬盡美盡善矣右北史文苑傳序

又云魏定鼎沙湖南包河淮西吞關隴當昔之士則有許謙崔宏崔浩高允高閭蓋實俱茂有永嘉之遺

烈焉太和在運銳情文學固以頽頏漢微跨蹠曹不  
明皇御曆文雅大盛陳郡袁畿袁曜河東裴敬憲莊  
伯伯茂范陽盧觀仲宣頓丘李諧渤海高肅河間邢  
藏趙國李騫樂安孫彥祖濟陰溫子昇咸能博綜繢  
緝興屬清華比于建安齊氏云啟廣延髦俊邢子才  
魏伯起盧元明魏景季崔長孺邢子明祖孝徵杜輔  
玄暢子烈盧洪勲天保中李愔陸卬崔瞻陸元規並  
在中書李廣樊遜李德林盧詢祖思道以文章著又  
王晞杜基卿劉逖魏騫蕭慤顏之推等並稱述于時  
周氏創業運屬陵夷纂遺文干旣喪聘奇士如弗及

足以蘇亮蘇綽盧柔唐瑾元偉李昶之徒咸奮鱗翼  
自致青紫云云

右北史所錄三朝名士今篇什傳者無幾因備存姓  
氏用闡遺遐大抵元魏之才子昇獨步高齊之譽邢  
魏齊肩周雖寥落而王庾二子實冠前流序弗列者  
豈以本皆南產耶

六朝前人主謚文者凡四漢宋二魏也子桓無論漢  
文稱其仁魏文稱其孝然二帝實皆有文漢文不見  
賈生自擬過之胸中蘊籍槩可想見惜製作不甚傳  
魏文史稱其雅好讀書史傳百家無不該涉善談莊

老尤精釋義才藻富贍好爲文章詩賦銘頌等太和  
十年已後詔冊皆帝文也自餘著述百有餘篇蓋元  
魏文人無能及者宋文景陽樓一首宏壯麗密時亦  
寡儕然則四君謚文皆無忝而孝文在夷狄則尤難  
也

孝文竹堂饗侍臣聯句云白日光天兮無不曜江左  
一隅獨未照羣臣和無及者非推避故自是當時咸  
出其下惟邢巒皇風一鼓兮九地匝戴日依天清六  
合差稱巒起經生爲大將稱文武全才而不云能詩  
觀此謂戎狄無人可乎以經術顯武功者惟杜常陽及巒

周明帝過舊宮詩云玉燭調秋氣金輿歷舊宮還如  
過白水更似入新豐秋潭漬晚菊寒井落踈桐舉杯  
延故老今聞歌大風整齊工密儼似唐初諸人五言  
詩

北朝諸王絕無習文事者惟彭城王勰差見翹楚所  
賦銅鞮松詩時以方曹子建謂幾于七步而成也今  
詩存云問松林松林知幾冬山川何如昔風雲與古  
同先是孝文賦此詩亦僅十許步今不傳

陳思煮豆雖七步而成第小詩耳不足盡所長也唐  
人有日賦萬言者二皆用吏十餘口授亭午而成七

千其事甚類余已別錄然二人雖平生製作亦無一傳得非以拙而速耶果爾卽日課萬篇曾不若賈島三年而得十字也詩話總龜載開元初有史青者零陵人上表以陳思七步成詩尚爲遲澁請五步成之明皇試以除夜應聲云今歲今宵盡明年明日催寒隨一夜去春逐五更來氣色空中改容顏暗裡催風光人不覺已入後園梅此篇甚佳宜其言之誇大迺唐詩人中紀事品彙諸書絕無史青名姓因以類附志于左此詩諸選多載或以爲明皇英華又作他名氏俱不言史青作恐五步之內未易辦斯也

宇文招周宗室封趙王與弟滕王迥並好文學今各

存詩一首二王與庾信王褒酬答頗有梁孝魏文之風北人中不多見也

企喻歌四首六代時北人歌謡僅此及鄒琊王鉅鹿公主數題見郭氏樂府此則元魏先世風謡也其詞剛猛激烈如云男兒欲作健結伴不須多鷁子經天飛羣雀兩向波等語真奈風小戎之遺其後卒雄據中華幾壹寓內卽數歌詞可徵舉六代江左之音率子夜前溪之類了無一韻丈夫風骨惡能衡抗北人陵夷至陳卒併隋世隋文稍知上質而取不以道故煬復爲春江玉樹等曲蓋至是南風漸漬于此而六

代淫靡之音極矣于是唐文挺出一掃而汎空之而  
三百年之詩遂駿駿上埒漢魏文章關係氣運昭灼  
如此今人率以一歌之微忽而不省余故詳著其說  
俟審音者評焉

鄉邪王歌八曲其音較企喻稍嬋緩蓋在南北之間  
第五首云長安十二門光門最妍雅渭水從陸來浮  
游渭橋下蓋是時姚興都關中頗饒樂寡兵爭此歌  
必其時作長安雖詞家通用至渭水渭橋則斷爲關  
中無疑或又以爲姚萇時歌按萇都關中事屬草創  
旋卽病殂非也

瑯琊王歌諸家咸無解考姚氏貴戚大臣惟姚緒封

晉王姚碩德封隴西王皆興叔父且勛望優崇故自

餘雖親子弟率封公如廣平東平之類殊無所謂瑯

琊王者而是時晉有瑯琊王司馬德文見興傳然不

云入秦也晉書瑯琊王紹傳當是馬達子或會稽王時國已除而猶與之俱有德文不可曉

此歌末章二憎馬高纏鬃遙翻身是龙誰能騎此馬

惟有廣平公按晉史載記廣平公弼姚興子泓弟也

有武幹赫連勃勃難起秦諸將成敗于獨弼率衆與

戰龙尾堡大破之據歌足可想見其人然貪殘好亂

欲殺泓而篡之興病革聞變因力疾臨殿前賜弼自

盡此歌正猶鄭人之歌叔段第亦可見其非姚萇及泓時作矣

慕容垂歌三首其一云慕容舉牆視吳軍無邊峙我身自分當枉殺牆外漢後二首語意略全諸家但注垂履歷而此歌出處懵然按垂與晉桓溫戰于枋頭大破之又從苻堅破晉將桓冲堅潰垂衆獨全俱未嘗少劙惟垂攻苻不爲劉牢之所敗秦人蓋因此作歌嘲之則此歌亦出于苻秦也

楊用修謂垂自作尤誤

蕭慤芙蓉露下落楊柳月中疎足爲北朝第一顏之推賞之可稱具眼而盧思道不以爲然又臨高臺云

崇臺高百尺迥出望仙宮龍棖浮朝氣飛梁照晚虹  
小衫飄霧縠艷粉拂輕紅笙吹汶陽篠琴奏嶧山桐  
舞逐飛龍引花隨少女風臨春今若此極宴豈無窮  
此篇整峭特甚惟第三聯失粘且與下聯句法相犯  
余欲爲除去此十字則上下粘帶音節格調亡不完  
美足與陰鏗安樂宮競爽入唐初皆爲第一書俟識  
者評之

又上之回云發軾城西時回輿事北遊山寒石道凍  
葉下故宮秋朔路傳清警邊風卷晝旒歲餘巡省畢  
擁杖返皇州此篇亦全合唐律者楊用修律祖取慤

芙蓉露下落一首而反遺此并錄之

顏之推馬色迷關吏雞鳴起戍人玄宗馬色分朝景  
雞聲逐曉風本此朝曉稍犯不若顏句穩健云

馮淑妃入周賜代王達達其嬖之馮彈琵琶絃斷作  
感琵琶云雖蒙今日寵猶憶昔時憐欲知心斷絕應  
看膝上絃王維莫以今時寵難忘舊日恩本此

宋劉昶入魏作斷句詩云云按此卽今絕句也絕句  
之名當始此以倉卒信口而成止于四句而篇足意  
完取斷絕之義因相沿爲絕句耳或謂漢魏已有絕  
句者不然蓋漢魏自有小詩四句者後人集詩以其

體相類故以此名之非本名絕句也

韓延之宋義士也司馬休之起兵劉裕以延之有幹用密招之延之復書斥裕詞絕壯憤司馬氏通鑑采之入魏有贈李處詩惜南史不列之忠義而置北史雜傳中因失而出之

見及韓詩集卷八見詩題

劉孝標本名法武年八歲爲魏兵所掠轉徙入代都貧不自立寄人廡下讀書後歸南朝居金華洞中南山樓志今傳龍城錄云金華山北有巖洞俗呼爲劉先生隱身處以松炬照之石刻云劉徽字仲卿漢室射校尉當恭顯之際極諫被貶於東陬隱迹於此

莫知所終卽道士蕭至玄所記也山口人時得王篆  
碑傳劉仲卿每至中元日來降洞中按此說吳正傳  
謂王性之僞撰所謂劉仲卿蓋卽孝標也世知孝標  
爲染人而不知入北故識此

又山懷詩見下條

劉孝標晚居吾郡遂爲婺人今紫薇岩是其讀書處孝  
標本以文學烜赫齊梁間篇什殊寡知者今所傳二古  
詩宏麗緻密遠薄宣城卽同時任況不無慙色憎他作  
不甚傳因詳錄于後俾不以文學沒其實焉自江州還  
入石頭云鼓枻浮大川延睇洛城觀洛城何鬱鬱杳與  
雲霄半前望蒼龍門斜瞻白鶴館槐垂御溝道柳綴金

隄岸迅馬晨風趨輕輿流水散高歌梁塵下絇瑟經禽  
亂我思江海遊曾無朝市玩忽寄靈臺宿空軒及闌嘆  
仲子入南楚伯勞出東漢何能棲樹枝取斃王孫彈始  
營山居云自簪厭誼囂執志好樓息嘯歌棄城市歸來  
事耕織築戶窺蕉冕開軒望嘶嘶激水簷前溜脩竹堂  
陰稍昏風鳴紫翠高梧巢綠蘋泉脉動杳杳流波下不  
極矚尋玉山隈想像瑤池側夜誦神仙記旦吸雲霞色  
將馭六龍輿行從三鳥食誰與金門士撫心論胸臆

又出塞一首云薊門秋氣清飛將出長城絕漠衝風  
急交河夜月明暗敵縱金鼓摧鋒揚旆旌去去無終

極日暮動邊聲右梁詩而聾元嚴整王楊極意無以加也

北朝人五言合唐律者惟王劭冬晚對雪云寒更傳唱晚清鏡覽衰顏隔牖風驚竹開簾雪滿山洒空深巷靜積素廣庭閒借問袁安舍翛然尚閉關此詩不但體格合唐其興象標韻無非唐人者楊用修五言律祖乃不列馮汝言詩紀亦遺之近閱文苑英華雪類得此因亟錄云

按隋書劭太原人字君懋弱冠好讀書家人竊所食盤中肉不之覺祖珽魏收等論古事有所遺忘討閱

不能得呼劭問之劭具陳出處取書驗之一無舛謬  
時人咸稱其博物齊滅入周後遂爲隋文帝知遇在  
著作二十年采擿經史謬誤爲讀書記三十卷世推  
精覈云據史則劭不特能詩其嗜學洽聞皆北士所  
罕覩以修隋書多蕪雜故聲譽不甚振然此詩風華  
奕奕非劉畫等比也

庾開府世但重其大篇視孝穆抱持但略以氣骨勝  
然不甚流轉五言小詩特有佳者合處往往類盛唐  
王子淵玄圃詩石壁如明鏡飛橋類飲虹太白兩水  
夾明鏡雙橋落彩虹全祖之

魏收尺書招建業及臨風想玄度二聯詩紀不錄意皆無全篇也

李騫崔劫使梁席上作簫簫風簾舉燈花寒不結見酉陽雜俎語齊類二子他作涇沒此亦可推

崔光答李彪百三郡國詩一卷見唐秘文志蓋二子皆能詩今它什亦不傳矣

楊用修記王無功云吾往見薛收白牛溪賦韻趣高奇詞義曠遠嵯峨蕭瑟真不可言壯哉遂乎楊班之儔也高人姚義嘗語吾曰薛生此文不可多得登太行俯滄海高深極矣吾近作河渚獨居賦爲仲長先

生所見以爲可與白牛連類因寫爲一本

今此二則俱不傳

酉陽雜俎云歷城縣魏明寺中有韓公碑太和中所造也魏公曾令人遍錄州界石碑言此碑詞義最善常藏一木於枕中故家人名此枕爲麒麟又曰麒麟北史雜俎記庾信曰我江南才士今日亦無舉世所推如溫子昇獨擅鄴下常見其詞筆亦足稱是遠名近得魏收數卷碑製作富逸特是高才也按子山推魏若此正與孝穆相左然收碑頌今亦罕見云溫孝陵碑不見傳古今文人險惡如鄒鴻豫息夫躬邪侵如許敬宗宋之問皆詞場諱言者然未有如北齊祖珽之甚也珽

傳載其履歷蓋市井販小人無賴之尤薄行不足以言之然自昔類書劉孝標何承天等悉不傳惟珽修文御覽特傳于宋詩載文苑英華凡三首亦綽約有南朝風珽雖屢嘗奇辱竟死牖下而其子君彥復以文知名隋末小人有天幸如此要之實古今滌氣所獨鍾也

北齊文士著者三人邢劭魏收祖珽珽齒惡汙賤爲古今詞人之冠收亦亞焉然其才實有可觀挾瑟歌云春風宛轉入曲房兼送小苑百花香白馬金鞍去未返銀裝玉筋下成行無論格調爲唐七言絕開山

祖其風致亦不減太白龍標但音節未盡諧蓋時代  
然也

邢子才差爲長厚亦不能無疵其詩乃稍事冲淡與  
梁陳諸家不類如夜直史館冬日傷志等篇輸寫情  
懷往往可觀至風音響北牖月影度南端折花步淇  
水撫瑟望叢臺等句標致亦不乏也北朝文士節行  
必以溫子昇爲最楊遵彥塞謡匪躬詞相慕掩之  
詩紀有盧詢中婦織流黃詩一首諸好呼用黃雀行  
一首二人絕無可考蓋詢卽詢祖也卽曾孫也古今  
同姓名者最衆然北朝詞客素寡安得一時人偶同

如此又絕不見於他書耶馮愼於闕疑故並存之  
北周文士王褒庾信爲冠然皆南人也西漢王褒同  
姓名同以才學顯世所共知以余考之古今有五王  
褒一唐人字士元亦能文卽補傳亢倉子者一見漢  
郊祀志一見神仙通鑑餘文士同姓名者甚衆詳見  
別編因予淵漫發於此若蕭轂之訛盧詢之脫則余  
灼見其然非鹵莽也

漢王褒字子淵周王褒傳云字子深非也必褒以名  
同漢人故遂襲稱其字傳作于唐人淵高祖諱也如  
陶淵明改稱深明而蕭淵明但稱蕭明云

詩紀隋陳子良後又有陳良亦脫子字文苑英華誤  
字甚衆見周必大表蓋宋已然

子良集三十卷乃載唐志等隋末人

詩紀有魏人袁曜馮氏疑爲躍字誤按躍瀛弟字景

騰以字義及兄名律之決當爲躍無疑且北史文苑傳及序皆止有躍而無所謂曜者此類直改正之也  
北朝人亦多有集今錄其存于唐者惟觀其目可也  
後魏孝文帝集四十卷 司空高允集二十卷

司農卿李諧集十卷

太常卿盧元明集十七卷

司空祭酒袁曜集十

卷

著作佐郎韓顯宗集十卷

散騎常侍溫子昇

集三十卷

太常卿陽固集三卷

薛孝通集六卷

宗欽集二卷

魏孝景集一卷

少傅蕭撝集十卷

北齊特進邢子才集

三十卷

尚書僕射魏收集七十卷

儀同劉逖集二十六卷

陽休之集三十卷

後周明帝集五十卷

趙平王集十卷

滕簡王集十二卷

儀同宗懔集十二卷

沙門釋亡名集十卷

小司空王褒集二十一卷

開府儀同庾信集

二十一卷

又衡集三卷畧集三卷

今考諸人詩存馮氏紀者魏文韓顯宗宗欽盧文明  
袁蹕趙王招滕王適各

一首

陽固

二首

周明帝

三首

高允宗

懷劉逖陽休之各

四首

蕭搗

五首

釋亾名

六首

邢邵

八首

昇

十一首

魏收

十二首

王褒

十四首

庾信

十五首

邢邵

李詣薛孝通無詩蕭慈顏之推無集記此以俟

續考

北朝集存于宋者惟庾開府二十卷此外盡亾余近

所收庾集外乃有王褒一二家蓋後人錄書中錄出

者非本書也

諸人著集者攷北史高允溫子昇蕭搗邢子才魏收  
王褒庾信各有傳李詣見崇傳下盧元明見玄傳下  
袁曜見翻傳下韓顯宗見麟麟傳下陽固及子休之  
俱見尼傳下魏孝景當作季景與收同族亦有傳相

聯薛孝通見辯傳下劉述見芳傳下大率皆名下士也

詩紀有韓延之贈中尉李虎詩云賈生謫長沙董儒  
詣臨江愧無若人迹忽尋兩賢踪追昔渠閣遊策弩  
廁羣龍如何情愿奪飄然事遠從痛哭去舊國啞泪  
屆新邦哀哉無援民嗷然失侶鴻馮注延之字顯宗  
事晉司馬休之休之敗入魏作此詩誤也按北史韓  
麒麟子顯宗字茂親以才學節槩傾動一昔晚遭張  
寔奏免謫白衣領諮謀以展後效顯宗旣失意遇信  
向洛乃爲五言詩贈御史中丞李虎以申憤結所撰

馮氏燕志及孝友傳十卷北史洎魏書載其履歷甚詳緣附父麒麟傳後故覽者不遑精究此詩正其被謫時作載傳中甚明者也詩紀注末亦謂一云韓顯宗字茂親而不復定爲其作蓋偶未讀此傳也第以爲韓延之亦有由延之旣謝絕劉裕以裕父名超宗顯宗曰以顯宗爲已字而名子曰翹示不爲裕臣也二人節槩剛挺頗類而延之見采通鑑稍稍有聞又詩中有去舊國届新邦及無援失侶等詞意亦恍忽相近故詩紀斷以爲延之而不審起句賈生董儒語迥不類且傳明言向洛贈彪去舊國二言乃爲向洛

發也富延之入魏在魏太武時而顯宗及李彪俱顯  
孝文時其世迥不相及彪傳載彪疏稱漁陽傳毗北  
平陽尼河間邢產廣平宋弁昌黎韓顯宗竝以文才  
見舉註述是同而享年弗永弗終茂績云則虎與

顯宗交契可見考延之及虎傳絕無游往之迹詩紀  
之誤無疑余舊亦以爲延之及讀麒麟傳乃知因字  
而誤忻然自快不啻隻一真珠船此卷前則尚仍詩  
紀之文今不復追改以志余讀書之未至且兩存以

俟精史學者

詩藪雜編三卷 終

詩數

閨餘上

五代

東越胡應麟著

古風兩漢近體三唐能事畢矣宋元以降世謂無詩  
迺其盛時巨擘旁午簡編詩家者流稍名涉獵咸指  
掌上獨自梁迄周五朝戎馬効勲文章否極韋莊羅  
隱諸人既繫籍于唐末徐鉉陶穀等輩又接輶於宋  
初自餘三二雋流或以詞見或以學稱歷數十百年  
中遂若茲道中絕無復一綫之存者近楊用脩詩話  
旁蒐僻隱不遺餘力此特未遑余暇讀五代小說雜  
談覺其間人雖微尚有足術句雖陋時時或可觀悼

彼生之不辰將泯泯借腐草木因悉采彙爲一編亾論雲間大呂卽方回阿段例掇弗遺庶異時博雅君子上下千秋於斯無憾於戲詩至五季洩勃之用亾當詞壇迺風雅大明之日猶有若余之藻飾而品題之者士誠志於不朽奚以後立爲患哉

大率五代詞人與南北朝絕類中原最寥落覽江淮爲盛楚蜀次之自歐陽氏不立文苑傳世率以馮瀛王輩俚語爲五代詩不知亦頗有工細者聊撮錄之

南唐中王後主皆有文後主一日重瞳子樂府爲宋人一代開山祖蓋溫韋雖藻麗而氣頗傷促意不勝

辭至此君方是當行作家清便宛轉詞家王孟其詩今存者四首附鼓吹未與晚唐七言律不類大槩是其詞耳凡詞人以所長入詩者其七言律非平韻玉

樓春卽襯字鷓鴣天也後主兄弘茂弟從謙各能詩

宋人小說記煜題扇詩揖讓月在手動搖風滿懷又

鬢從今日添新白菊是去年依舊黃率無全篇嘗著

雜說百篇時以方輿論云

見江南別錄又后山詩譜徐鉉稱煜秋月篇今不傳

孟後主昶世以荒淫不道然實留心文藝嘗與花蕊

夫人納涼作詞云冰肌玉骨清涼無汗水殿風來暗

香蒲簾開明月獨窺人欹枕釵橫鬢雲亂起來瓊戶

啟無聲時見疎星度河漢屈指西風幾時來只恐流  
年暗中換按昶詞蘇長公洞仙歌全穩括之元人琵  
琶記新築池閣亦出此而花間集不載近吳興補刻  
復遺之因錄此昶又嘗書石刻五經當唐末海內名  
畫士戚八益州昶子玄寶甫齡誦萬言七歲卒先是  
王蜀王衍亦能文詞見劉備板等書吳越後主亦能詩話

錢忠懿王倣亦能詩汝帖載其七言一律云廊廡  
翠幙遮禁林深處絕喧譁界開日影憐空翠穿破苔  
痕惡笋芽西第晚宜供露茗小池寒欲結冰花謝公  
未是深沉量彷彿把輸羸局上誇詩不能大佳然五代

昔李重光最有文詩律亦僅爾爾此載石刻中又將  
湮沒故錄又後山詩話記其金鳳欲飛遭掣搦一詞  
是倣不但能詩並解長短句也至宋而錢惟演董子  
孫咸以文鳴矣

五代諸後主南唐孟蜀各以詞翰聞吳越雖不甚表  
著郎帖中可窺一脔皆遠勝創業者又王蜀後主衍  
亦能詩詞所輯有烟花集又李後主弟從謹兄弘茂  
並知名見南唐書蜀檮杌等錄

後唐莊宗世知其勇略及俳優戲劇而已然實于文  
稅留心者史稱其幼好學通春秋大義又嘗手抄春

秋曰我于十指上得天下見高季興傳中五代優伶傳云莊宗知音能度曲至今汾晉間往往能歌其聲樂府所傳如梦令一詞殊不在李王父子下第以沙陀能此尤不易云

王仁裕孟蜀學士嘗夢人以刀剖腹引西江水洗其腸胃因名集曰西江詩平生殆萬首今不傳宋穉文志有仁裕他集而無所謂西江者惟玉堂閒話尚行世中載七言律數首皆清雅特格卑弱耳登麥積山絕頂云踏遍懸空萬仞梯等閑身共白雲齊窓中下見羣山盡堂上平分落日低絕頂路危人少到古岩

松徒鶴長棲天邊爲要留名姓拂石殿勤手自題仁

裕又有賀王溥一律載總龜世所傳開元遺事非其

撰也

五代史獨仁裕和凝有傳仁裕字德輦天水人仕蜀歷唐晉漢至少保與凝集各至百卷

和凝字成績生平撰述共分爲六種香奩集其一也

今獨此傳其句多浮艷如仙樹有花難問種御香聞

氣不知名鬟巫香頸雲遮藕粉着蘭胸雪壓梅靜中

樓閣春深雨遠處簾櫳半夜燈皆見瀛奎律髓方氏

以爲韓渥葉少蘊以爲韓熙載大槩晚唐五代調率

相似第渥當亂離際以忠鯁幾殺身其詩氣骨有足

取者與香奩殊不類謂凝及熙載則意頗近之詩話

總龜又載凝桃花臉薄難成醉柳葉眉長易覺愁之  
句可証云新仕書目漢封魯公

劉昭禹婺人少師林寬後爲湖南宰終桂府幕官蓋  
當在陳陶羅隱輩後又有經費冠鄉舊居詩紀事乃  
列之嚴維李泌前大誤紀事最精詳而亦有謬甚當  
改正者如呂溫呂恭皆呂渭子今乃溫恭列前而渭  
在五卷後此類是也紀事云劉當時在駐州刺史以未然

昭禹題經費冠鄉舊居云節高終不起死戀九華山  
聖主情何切孤雲性本閑名傳中國外墳在亂松間  
依約魯棲處斜陽鳥自還懷隱者云先生入太華杳

杳絕良音秋夢有時見孤雲無處尋神清峰頂立衣  
冷瀑邊吟應嗟千名者六街塵土深又有句云向  
夜深得心從天外歸

品彙有劉昭屬送休上人之衡岳詩一絕此必昭禹  
作禹與屬文相亂耳休上人卽貫休事楚圓嘗居衡

岳間

詩八草履初登南岳紅羽瓶猶貯北山泉衡陽舊寺春風晚門鎖寒潭幾樹蟬

曹松衡陽人贈陳先生云讀太玄經秋蘸罷注參全  
契夜燈微羅大夫故居云鹿眠荒園寒蕪白鷗噪殘  
陽敗葉飛見詩話總龜按唐有曹松卽一將功成萬  
骨枯者非此也

孫光憲竹枝詞云門前春水白蘋花岸上無人小艇  
斜商女經過江欲暮散拋殘食飼神鴉柳枝詞云閭  
門風暖落花乾飛遍江城雪不寒獨有晚來臨水驛  
遊人多凭赤欄杆二詩見郭氏樂府品彙已收之按  
三楚新錄云光憲蜀人高氏辟爲書記表章文檄皆  
出其手最好聚書以兵革難致每發使諸道必重價  
募得之蓄書至萬餘卷然自負史才以藩服恒鬱鬱  
每吟昔人詩曰一生不得文章力百口空爲飽煖家  
品彙取其詩入唐亦未當如曰凡五代悉係之唐則  
王仁裕等皆不得遺必仕宦唐世或撰述聲名已著

唐時者乃可光憲北夢瑣言尚傳

韓熙載相南唐有文名詩之傳者獨寡惟七年蓬島音塵絕一絕見詩話熙載亦謚文江南人呼爲韓文公世所傳昌黎像皆熙載也見筆談又江南別錄云韓熙載徐鉉兄弟爲當代文宗繼以潘佑張洎以才名顯故江左三十年文物有貞觀元和之風按潘佑文今尚存送人一篇見晁文元道院集要江南別錄陳彭年撰彭年以博洽聞于宋初南唐人也

李建勲父德誠已爲楊行密將後尚主入相至江南垂亡始沒於唐世亾毫髮不與計氏紀事不錄良是

近以其集存乃列百家詩中大可笑品彙因之亦誤今五代詩集傳者僅建勲一家而已集中佳句頗多雖晚唐卑下格然模寫情事殊工漫摘數聯于後  
歐伎云當時心已悔徹夜手猶香夏日云池映春篁老簷垂夏果新寄僧云杉松新夏後雨雹夜禪中闕下云鳳翔雙閒曉蟬噪六街秋宮詞云簾垂粉閣春將盡門掩梨花日漸長故壇云舊碑經亂沈荒澗靈篆因畊出故基殘牡丹云失意婕妤粧漸薄背身西子病難扶望廬山云雲暗半空藏萬仞雪迷雙灑在中峰皆有思致聽笛及批牒二絕句一元南唐近事今

集中所遺者并識之

伍喬詩一卷類刻唐百家僅七言律二十首蓋類書  
抄合者有詩上杜牧疑唐末人然唐餘錄江南垂亾  
命喬放進士榜又集有寄史虛白詩南唐人無疑也  
其句如登閣共看彭蠡浪圍爐同憶杜陵秋石樓待  
月橫琴久漁浦驚風下釣遲亦有風韻瀛奎律髓取  
喬二首今存

廖凝字熙績隱居南岳江南後仕爲彭澤令遷連州  
刺史與李建勣爲詩有集行立咏中秋月與聞蟬爲  
絕唱中秋月云九十日秋色今宵已平分孤光吞列  
宿四面絕微雲衆木排疎影寒流疊細紋遙遙望丹

桂心緒正紛紛聞蟬云一聲初應候萬木已西風偏感  
異鄉客先於離塞鴻日斜金谷靜雨過石城空此處  
不堪聽蕭條千古同初宰彭澤有句云風清竹閣留  
僧話雨濕莎庭放吏衙江左學詩者競造其門

廖融字元素隱衡山與逸人任鵠王正巳凌蟾王元  
游贈天台逸人云移檜託禪子攜家上赤城拂琴天  
頌寂寥枕海濤生雪白寒峰晚鳥歌春谷晴又聞求  
桂機載月十洲行題檜云何人見植初老對梵王居  
聲高秋漢迥影倒月潭虛夢仙云翠鳳引遊三島路  
赤龍飛駕五雲車退宮妓云神仙風格本難儔曾從

前皇翠輦遊紅躡躅繁金殿暖碧芙蓉笑水宮秋寶  
車鈿剥陰塵覆錦帳香銷盡惆愁一旦色衰歸故里  
月明猶夢按梁州右見都閣雅談二廖並居南岳當

是兄弟調亦相類皆晚唐之幽斂者

又句雲穿搗葉屋雪壓釣魚冊

翁宏字大舉桂嶺人寓居韶賀間中秋月云寒侵萬  
國土冷浸四維根送人云萬木殘秋裡孤舟半夜猿  
曉月云漏光殘井甃缺影背山椒塞上云風高弓力  
滿霜重角聲枯又宮詞落花人獨立微雨燕雙飛最  
佳二句或以爲晏叔原作見都閣雅談

張子明攸縣人居鳳巢山孤鴈詩云雖逢夜雨迷深

浦終向晴天着舊行

伍彬邵陽人初仕馬氏後入宋喜雨云稚子出看莎  
徑沒漁翁來報竹橋流解官云蹤迹未辭鴛鴦侶夢  
魂先到鷓鴣村又劉章亦事馬氏有蒲鞋詩見舟銅錄

路振唐相岩玄孫贈彬云庭樹鳥頻啄山房人未眠  
寒岩落桂子野水過茶烟

王元字文元桂林人登祝融峰云勢疑撞翼軒翠欲  
滴瀟湘贈廖融云伴行惟寢鶴尋寺入深雲棹李韶  
云雅句僧抄遍孤墳客吊稀答史虛白云飯僧春嶺  
蕨醒酒雪潭魚後終于長沙虛白見唐餘隱逸傳奇人也

下震蜀人卽事云兩壁長秋菌風枝落病蟬又茶香  
解睡磨鎗煮山色牽懷著屐登

裴諸說弟說見唐詩紀事諧終于桂嶺湘江吟云風  
回山火斷潮落岸水高杜甫墳云名終埋不得骨任  
朽何妨

馮延巳相南唐以詞顯今傳見花間集嘗有句云鴛  
瓦數行曉日龍旂百尺春風

陸蟾居攸縣題子規云花殘班竹廟雨歇峴山亭樹  
鏹月欲落怨間酒正醒並詩話總龜

夏寶松廬陵人與劉洞唱和李德誠贈詩曰建水舊

傳劉夜坐

洞有夜坐詩

螺川新有夏江城寶松江城詩云

鴈飛南浦鍾初斷月滿西樓酒半醒曉來羸駟依然

去雨後遙山數點青

江南野錄

蜀王義方春日詩海邊紅日半離水天外煖風輕到

花又蜀王廷珪詩十字水中分島嶼數重花外見樓

臺潘天錫南唐人仕至員外與沈彬分題云風便磬

聲遠日斜樓影長彬詩云松欹晚影離壇草鍾撼秋

聲入殿廊

收入唐人中然仕南唐甚顯

九華山人熊皎早行云山前猶見月陌上未逢人山

居云果熟秋先落禽寒夜未棲

並郡閨雅談

李範關中人題王山人故居云鶴歸秋漢遠人去草堂空秋日云清猿啼遠木白鳥下前灘

楊鳧字鳥之山中云背日流泉生凍蛩逆風歸鳥赴巢遲又皮光業句行人折柳和輕絮飛燕啣泥帶落

陳誼吉州人題螺江廟云廟裏杉松蕭颯颯廟前江水碧溶溶凭闌不見當時事落日遠山千萬重

孟賓于蟠溪云松根盤蘚石花影卧沙鷗

徐休雅長沙人宮詞云內人曉起怯春寒輕揭珠簾看牡丹一把柳絲鈎不住和風搭在玉闌干

任鵠送王正已云五峰青柱天直下挂飛泉琴鶴同

歸去煙霞到處眠  
鼯跳霜葉逕虎嘯夕陽川獨酌應懷我排空樹影連  
又邵拙詩萬國未得雨孤雲猶在

陸蟾居攸縣題石頭城云兼葭侵壞壘  
煙霏接滄洲孟嘏贈史虛白云詩酒獨遊寺琴書多寄僧

陳甫字惟岳吉水人感懷云一雨洗殘暑  
萬家生早涼村居云暮鳥歸巢急寒牛下隴遲

高元矩宣城人贈徐學士云燕掠琴絃穿靜院吏收詩草下間庭並郡閨雅錄

歙州問政山聶道士所居嘗有人陟險攀蘿至絕壁  
於巖下嵌空處見題詩一首雖苔蘚昏蝕而文尚可

辯未云黃台作其詞云千尋練帶新安水萬仞花屏  
問政山自少雲霞居物外不多塵土到人間溪童乞  
火朝敲竹山鬼聽琴夜撼櫟草暗碧潭思句曲松昏  
紫氣度函關龜成淺甲毛猶綠鶴化幽翎頂更殷阮  
洞神仙分藥去茅家兄弟寄書還黃精苗倒眠青麿  
紅杏枝低掛白鵝容易煮茶供客用辛勤栽果與猿  
攀常尋靈穴通三島擬過流沙化百蠻新隱漸開侵  
月窟舊林猶貌枕沙礬手疎俗禮慵非傲肘護靈方  
秘不慳海上使頻青鳥點篋中藏久白驥頑筠杖徒  
杖菖蒲節笋榔高簪玳瑁班花氣薰心香馥馥澗聲

聆耳冷潺潺高墳自掩浮生骨短晷難窮不死顏早

晚重逢蕭堦客願隨芝蓋出塵寰右載青絹雜記末

云台國初任屯田員外蓋五代人仕宋者此篇整練

宏富非大才力不易到押險韻尤工密因稍節略錄

左方余考宋七言排律遂亾一佳唐惟女子魚玄机

酬倡二篇可取諸選亦不及六道肩吾百韻在二作下

陳希夷生唐德宗世歷五代至宋初嘗與毛女遊贈

詩云有時問着秦宮事笑撫仙花望太虛翰林名談

羽流舒道紀題赤松宮云松老赤松原松間廟宛然

人皆有兄弟誰共得神仙雙鶴冲天去羣羊化石眠

至今丹井水杳渺北山田雖晚唐體而句語渾成足爲佳什與李頻四皓東西南北人一首絕類又題浩然觀云澄心坐清境虛白生林端夜靜嘯聲出月明松影寒絳霞封藥竈碧寶灑齋壇海樹幾回老先生棋未殘舒五代人名見貫休集浩然觀在吾邑今不存

見吳正傳詩話

許堅題幽栖觀云仙翁上昇去丹井寄晴壑山色接天台湖光照寥廓玉洞絕無人老檜猶棲鶴我欲掣青蛇咤時<sub>中碧落</sub>後不知所終

唐餘紀傳

伊用昌留題皂閣觀云雨吹山腳毒龍起月照松梢

孤鶴回

以下

並郡閣雅談

沈廷瑞彬子南唐人有句云金鼎銷紅日丹田老

白雲

李夢符梁開平初人漁父詞云村寺鍾聲度遠灘半  
輪殘月落前山徐徐撥棹却歸灣浪疊明霞錦

翻

李昇受禪初忽夜半有僧撞鉢執至將殺之僧口適  
吟得中秋月詩命誦之曰徐徐出東海漸漸上雲衢  
此夜一輪滿清光何處無昇喜遂釋之行見江南野

錄然或以爲賈休

西山與滕閣對峙留題遍寺中有僧至言詩總不佳  
何不撤去守問僧能乎卽吟曰洪州太白方積翠浦

蒼蒼萬古碍新月半江無夕陽按末聯或以爲陳希夷今讀此前兩句氣勢相應信僧作也宋人以爲切西山故盛傳第以此意繹之反覺纖巧只泛然着自渾成此又見劉貢父詩話曰宋初僧所題

湘南僧文喜失鶴詩一向亂雲尋不得幾臨流水待歸來見雅談

茱山老僧詩一池荷葉衣無盡數盆松花食有餘剛被傷人相問詢老僧今日又移居見摭遺元人易未二句作隱者詩

蜀僧遠國感懷云丹禁夜涼空鎖月後庭春老亂花飛唐宋僧齊已虛中皆居楚貫休後入蜀滿堂花醉三

千客一劍霜寒十四州鴈宕經行雲漠漠龍湫燕坐  
雨濛濛皆無全篇又蜀僧有蒸豚詩見總龜

又湘南  
乾康有

咏雪詩

女狀元王蜀黃崇嘏也崇嘏臨邛人作詩上蜀相周  
庠庠首薦之屢攝府縣吏事精敏胥徒畏服庠欲妻  
以女黃以詩辭之曰一辭拾翠碧江消貧守蓬茅但  
賦詩自服藍衫居郡掾永拋鸞鏡畫蛾眉立身卓爾  
青松操挺志堅然白璧姿慕府君容爲坦腹頭天速  
變作男兒庠大驚具述本末乃稼之傳奇有女狀元  
春桃記云云按右詩不類嘗爲狀頭一說謂黃爲郡

棣郡守欲以女妻之黃上詩自述守大驚詢之知本  
黃使君女所居惟一老嫗遂嫁之蓋后人因此演繹  
爲傳奇而以狀元附會用修據爲事實恐不然

見太平廣記

花蘤夫人費姓或云徐氏按郎瑛類彙以蜀有兩花  
蘤皆能詩皆人國皆徐氏也王蜀徐妃二人亦各知  
爲詩見蜀檮杌一號花蘤孟蜀花蘤宮詞一卷今傳  
又君王城上樹降旗絕句載後山詩話嘗供事故主  
像宋王問之以張仙對信慧頴女子也

盧絳字晉卿夢一婦人贈詩曰清風明月夜深時箕

帝盧郎恨已遲。它日孟家陂上約再來相見是佳期。

江南伶人李家明王感化亦各能詩蓋唐所無云

唐詩人仕宦五代及流寓隱遜諸藩人與事可考見

者漫記其略

徐鉉張洎陶穀梁清翰孫光憲陳詣伍喬皆入宋李九齡五代人今列唐非也

沈彬唐末舉進士不第晚仕南唐貴顯次子亦能詩

宋初尚存見南唐近事

孫鮒與沈彬李建勣友善亦終於南唐

陳陶晚居江南本楚中人嚴尚書宇鎮豫章遺小妓號蓮花者徃西山待陶陶殊不顧妓爲詩曰蓮花爲號玉爲腮珍重尚書遺妾來處土不生巫峽夢虛勞

神女下陽臺陶答之云云今作陳曷南誤

羅隱嘗爲錢鏐判官晚終魏博羅紹威師事之稱叔父紹威亦能詩有樓前灔澦雲頭日簾外蕭蕭雨腳風之句以隱集名江東自名其集偷江東紹威父弘信有題柳七言律今傳唐武臣父子能詩僅此杜荀鶴嘗上詩朱全忠溫賊以秀才呼之見太平廣記品彙列陸龜蒙輩前恐誤杜後爲田頤客

李山甫爲樂彥禎從事公乘億同今詩集列五代

皮日休晚終南粵一說謂造識文黃巢殺之非也辯見兩山墨談又通考載陸放翁引皮光業辯光業當是襲美後人俟考

張蠻晚仕蜀中白日地中出黃河天外來蠻句也唐詩之壯渾者終于此

又水向昆明潤山通大夏深見瀛奎律韻亦壯而今集不收

韋莊爲蜀相晚唐詩人之顯者莊其最也

江爲居南唐以讒死宋文鑑有爲詩疑品彙所考未確然宋人有哭江處士詩意與品彙合蓋文鑑之

誤也

牛嶠仕王獨柳枝詞二首見樂府頗工

路德延作孩兒詩五十韻爲樂彥禎所殺宋張師錫步其韻作老兒詩五十韻尤可嗟二作今皆傳

總龜

馮涓仕王蜀爲翰林學上

見紀事

張泌宋初尚存

歐陽氏史不立文苑傳以五代無文也雜傳以詞學

稱者李琪李愚馬胤孫馬縞崔居儉李惣盧質薛融  
李崧王延裴韓諸人而獨稱王仁裕和凝爲文章宗  
匠以饒著作故第五代兼長詩文者實僅僅二子考  
凝詩詞槩多猥褻仁裕敘述亦萎繭無大過人自餘  
可見劉昫賈緯並以史稱緯書不傳而昫舊唐書近  
頗行世或以勝新史余不敢知然唐事亾徵者賴以  
參考云又胡嶠陷虜記今附載五代史契丹末嶠石  
晉人